

At lagaaling sepsev avanna at lereterenan at ne
Elisabet, Moroa ga sak tiki laangelo ren, ne Gabriel
uto Nasaret, lara lemenemen to at lenep silok Galili.
Ni gat pas mi levelinga ti lara loono maxat laasen
teren ne Maria, mo diga lok katling i xusu naba epot
at lara laradi laasen teren ne Josep, at livisik li at ne
Devit, loorong silok me gano.



Ketla laangelo ga lok tin, "Maria,
nemen uta marat, mila ne Moroa ira
lok momo vam minu. Unaba renan la
unaba visik tamdak, la uba so asen
i mi ne Iesu. Neni naba silok
aleng la neni naba ruuna na
laasen do lamdak at ne
Moroa i silok aleng. Moroa naba
lox i ngan loorong silok, i ngan [lara]
ren ne Devit, neni loorong silok me
gano; la neni naba nemen amisik ngan
loorong silok at livisik li at ne Jakop;

lixitkis orong teren noxo xap!"



Maria ga lok ti laangelo, "Nenia kopmen ana epot! Naba lok kereva na?" Laangelo ga lok tin, "Loroonan Kaala naba vot saparav u, la lololos at ne Moroa naba los kis taram; kuren la nom lamdak dadat diba so asen i do lamdak at ne Moroa."



Melemu at lentaba levenaleng Maria ga lox
agagas, la ni gat pas soso uto at
lempatkaana at lara lemenemen gak lok to
at lenep kangka Juda.
Ni ga vubeles uto
xeneng at loogu at ne
Sakaria la ga vaase
momo ri ne Elisabet.
Ga se ne Elisabet
ga rongga mo
levelinga at ne
Maria, lamdak ga
xuluxut to xeneng
at lebelen.



La ne Elisabet ga umsu mi Loroonan Kaala,
la ni ga vaase silok keretna, "Nenu loono u
umsu mi loklox anarong tinedi lavakin axap,
la nom lamdak nenu uba
visix i, Moroa naba
lox anarong i!"



Anai ni leretere ri livipisik at ne Iesu Karisito.
Maria, nenen ne Iesu diga
ora ka i xusu latkin ti ne
Josep, ketla kovisi du goxo
epot, Maria ga long lenget
ka i do neni mo ga balan
madak mi lololos at
Loroonan Kaala.



Ne Josep, latlok teren, neni lagale laradi la ga mumu
asu avukat Lenavolo at ne
Moses; ga lok lodoxoma
ren kusu na ke xepe ne
Maria. Ketla neni goxo
vara i xusu na lox
amangan i ro at
lemeren limixin
axap. Neni ga lok
do na lok kepe
nemnem mene i.



Josep gam doma mumu i na la at lara laxanimin
laangelo at ne Moroa ga vot saporav i at loromtobo la
ga lok, "Josep. Livisik li at ne Devit.
Nemen gat uta marat kusu una lok ka
ne Maria ngan latkin tu, mila mo
labalan madak neni i ruuna i,
neni at Loroonan Kaala."



"Neni naba visik lamdak temes la uba so asen i mi ne Iesu, (Lavasuun teren do laradi loklox arooro) mila neni naba lox arooro limixin teren basinge laxakapmek atdi."



La ne Josep ga xatu kaxat ap mo laaleng petpes la ga mu asu levelinga at laangelo at Leeme Silok ne Moroa, la ni ga epot ka ne Maria. Ketla neni goxo midi eburu mi ne Maria, se neni ga visik lamdak teren. La ne Josep ga so asen i mi ne Iesu.



Jon move ga lixilik la ne Kaisar Ogastas ga lox aonon
lavapaase axasep tinedi limixin digak lok maxopok
atlagavaman boro Romkusu
dina malagan amaxat ka
levenasen atdi.
Nedi limixin
getgesara



digat pas tilevenmenemen
axa atdi kusu dina lok li levenasen atdi.



La ne Josep ga nemen at lemenemen Nasaret at lenep silok Galili. Ni ga ronga na levelinga la at lara laaleng ni ga vas kaxat uto at lemenemen, laasen teren, Betilem mo gak lok at lenep silok



Judaia; mo lemenemen at loorong silok ne Devit.



Josep gat pas ugo, mila ga neni livisik li at ne Devit,
la kusu ni na lok li laasen teren eburu mi ne Maria;
neni diga lok katling i xusu
naba epot at ne Josep.
Neni ga balan
madak.



La nedu duga rupot to
Betilem, la laaleng ga
vot nga kusu ne Maria
na visik lamdak teren.



La ni ga visik lamdak temes avot teren, la ga bom i mi
leventamon la ga vaxamdi i ro at loxot anan at
laxanbulumaxao, mila goxopmen
toxot tidu ri nemen to at
loogu mikmidi.



Ap mo laxanimin lentaba luvuttadi loklok tatao sipsip
diga nemen ap mo lenep, digak lok tatao levesipsip
atdi. La laangelo at ne Moroa ga vot
saparap di, la lisisixam at

ne Moroa
ga so
axasep nedi
la ga vung

kamit mo
loxot axap.



La diga marat aleng tinotno. Ketla laangelo ga lok tidi,
"Nemen mita marat! neni Lanarong la Leeme Silok!
Nenia ana tong levelinga avukat
tinimi, kusu naba lox
amomo
limixin
axap."



"Lingina at na laaleng to at lemenemen at ne Devit,
Laradi Loklox Arooro atnimi dira visik pam i; Loklok
katling at na lavanga i lok keretna;
miba long lenget ka

lumumulum
di bom i mi
leventamon
la ik midi ro
at loxot anan

at
laxanbulumaxao."



La soso mun, buaang nedi lubang angelo boro vana at
laxalibet diga vot eburu mi mo laangelo,
diga emi asu saparap ne Moroa;
la diga lok keretna, ...



... "Ata emi asu mi ne Moroa ik lok to vana at
laxalibet, la lumulum at ne Moroa bak lok
at na lavatbung menemen tinedi ne
Moroa i momo midi."



La lubung angelo diga on basinge di, la digamlong
manga uto vana at laxalibet, la luvuttadi loklok tatao
sipsip diga epaase minedi getgesara xeretna, "Atat
pas uto Betilem la ata ven mo lumumulum, ne
Moroa ira tong pam i ridik."



La diga vas kaxat soso mun, diga vot posiga ne Maria
la ne Josep, la diga long lenget ka lumumulum gak midi
to at loxot anan at laxanbulumaxao. Ga se mo
luvuttadi loklok tatao sipsip diga ven lumumulum,
diga on basinge i, la diga paase asu levelinga at
laangelo ri limixin axap.



Maria ga visik ne
Iesu ro Betilem, at
lenep silok Judaia.
Ap mo levenaleng ne
Erodes ga nemen
ngan loorong
silok.

Melemu lentaba luvuttadi leklen at
larapenti digat pas boro at lenep
laxangking it losu e uto Jerusalem
la diga sue limixin go, "Lumumulum
ua diga visix i kusu na lok ngan
loorong silok ti limixin me Judaia?"





"Maga ven lenti ren to at lenep
laxangking it losu e, la marat
pas ude xusu mana lotu saparav i."

La ne Erodes ga ro bubua
nemnem ka mo luvuttadi
leklen la ga sue di mi
laaleng salai mo lenti ga
so su ren. Melemu neni ga
riki di uto Betilem mi
levelinga xeretna, "Minat
pas la mina puse avukat ti
mo lamdak; la do mina vuse
sa ren, miba tong axasep box
ia min, kusu nenia
bok abavosiga
i la ana lotu
saparav i."



Melemu at na levelinga at Loorong Silok, diga vas
kaxat, la at lavatpas atdi ro at langas diga ven manga
mo lenti, no diga ven avot pam i ro at
lenep laxangking it losu e.
At loxonaleng diga ven i,
lomomo atdi ga silok aleng.

Mo lenti gam gomgo
ridi se ga ru ro
mavana ap mo loogu
ne Iesu gak midi
ren.



Diga beles ukeneng la diga ven lamdak eburu mi ne
Maria, nenen. Diga xis tiktikbu mi lempatgulom atdi la
diga milik tiding si ukopok la
diga lotu saparav i. La diga
suang lengkontonom atdi la
diga lok letaba rin mi logol,
laxadan somavak,
la laxadan mi
luunun silok.



Melemu at nai Moroa ga vaase di xeneng at loromtobo
do nemen gat ditamlong uto saparap ne Erodes.

Kuren la diga vas bilong uto at
lenep kangka atdi at lara
langas petpes.



Se mo luvuttadi leklen diga
vas kaxat pam, laangelo at
Leeme Silok ne Moroa ga vot
parap ne Josep keneng at
loromtobo la ga lok, "Una
xatu kaxat la una lok
kaka lamdak eburu mi
nenen la mina sixiro
uto Isip, la mina
nemen go

se nenia aba tong
i rinimi do mina on
basinge mo lenep, . . ."





"... mila ne Erodes mo naba
reven pupuke ri lamdak kusu
na sev amer i." Kuren la ne
Josep ga xatu kaxat, la ga
lok kaka lamdak eburu mi
nenen, la ap mo mene
laxanimin diga vas
kaxat basinge mo
lemenemen Betilem la
uto Isip.





La diga nemen go se ne
Erodes ga met. Nai lempanga
ga vot kusu ri lox asorun
levelinga at ne Moroa ga
vaase asu i at lungusno
leeme vapaase alii ren
keretna, 'Aga xup kaka
lamdak tarak boro Isip.'



Se ne Erodes ga long lenget
ka i do luvuttadi leklen diga
bala vukpux i, neni ga musak
aleng. Neni ga raba linga
limixin esep teren kusu dina
sev amet laxamdak temes,



... lenmaares atdi ga epovo at
legepura la maxopok, to
Betilem la at levenmenemen
bok gak lox auret, mumu
levelinga neni gara rongga vam
i boro at luvuttadi leklen, mumu
laaleng lenti ga so suu.





Melemu at lanmet at ne
Erodes, laangelo at Leeme
Silok ne Moroa ga vot
saparap ne Josep keneng at
loromtobo to Isip. La ga lok,
"Una xatu kaxat, la una
lok ka lamdak eburu mi
nenen, la minamlong
uto at lenep silok
Israel; mila

mo luvuttadi diga lok do
dina sev amet nom
lamdak, dira met pam."



Se ne Josep ga rongga i do
Akeleas mo ga lok ka
lixitkis at ne temen,
ne Erodes, ngan
loorong silok
boro



Judaia, neni ga marat
kusu ri nemen go. La laangelo ga
raba linga manga i xeneng at loromtobo,
kuren la digat pas uto at lenep silok Galili.



La diga nemen to Nasaret.
La levelinga at
lavaeme vapaase alii
ga sorun. Mo levelinga
ga lok keretna,



'Diba so asen i do
neni lanat me Nasaret.'



Moroa ga balamu rinotno limixin
axap at na lavatbung menemen, kuren
la ni gam taba mi legesa madak mun
teren, kusu do nege i nuunu ren,
neni noxo seeve, ketla neni
naba ruuna ka lorooro
avolo.



Rom 3:23

Atla limixin axap digara lok pam laxapmek la digara subu kot basinge loklok mokmokso at ne Moroa.

Rom 6:23

Luunun at laxapmek, ni lanmet; ketla laramtaba at ne Moroa, ni lorooro avolo keneng at ne Iesu Karisito, Leeme Silok atnedik.

Ibru 9:27

Limixin axap dinaba met la melemu at na, Moroa ba lok li di at lavapaase.



Epesas 2:8,9

Moroa ga lox arooro nedik maxeneng at letaba nabalamu ren, mo letaba nabalamu ik lok tinedi di nuunu at ne Iesu Karisito. Limixin kopmen dina epovo kusu dina lox arooro nedi xa; ketla mo letaba nabalamu, ni laramtaba boro at ne Moroa. Kopmen tara i epovo na lok kaka loklox arooro mumu leven gugu nunuan teren, mila mo do xuren, limixin diba simi aurut di.

Rom 10:9,10

Do mina vaase asu mi levenbulubun atnimi do ne Iesu ni Leeme Silok, la mina nuunu mi lebelen nimi axap do ne Moroa ga lox aroo amlong ne Iesu at lanmet, nemi minaba roo suu. Kuren la nemi do mina nuunu mi lebelen nimi axap, nemi minaba sepmus; la do mina vaase asu i mi levenbulubun atnimi, minaba roo suu.



Jon 3:16,17

Moroa ga balamu rinotno limixin axap at na lavatbung menemen, kuren la ni gam taba mi legesa madak mun teren, kusu do nege i nuunu ren, neni noxo seeve, ketla neni naba ruuna ka lorooro avolo.

Moroa ga riki ne Nitna ude at na lavatbung menemen kopmen do neni na lok li loxokoxo ri limixin. Ketla Moroa ga riki ne Nitna xusu neni Laradi Loklox Arooro ridi.

1 Jon 5:11-13

Mo levelinga i lok keretna, Moroa ga raba vam dik mi lorooro avolo, la langas ti mo lorooro i nemen at lekngen ne Nitna. Dola tara i nuunu at ne Iesu, i ruuna ka vam nom lorooro. Do tara kopmen na nuunu at ne Iesu, ne Nitna ne Moroa, neni noxo ruuna ka nom lorooro. Nia a malagan na lempanga rinemi mi nuunu at laasen at ne Nitna ne Moroa kusu mina xasep do mira ruuna ka vam lorooro avolo.



Metiu 1-2; Luk 1-2

Storyline by: Edward D. Hughes

Illustrated by: M. Maillot
and Alastair Paterson

Adapted by: E. Frischbutter, Sarah S.

Madak Bible (mmx) © 2011, Wycliffe Bible
Translators, Inc. All rights reserved.

<https://www.bible.com/bible/1099/MAT.1>

©2024 Bible for Children, Inc.

www.M1914.org

www.bibleforchildren.org

